

# Breil perda – S-chanf gudogna – Cuira baratta la brigada

Nov concept da staziunament da l'armada svizra

CUN ANDRÉ BLATTMANN  
HA DISCURRÌ CLAUDIA CADRUVI / ANR

■ **L'armada banduna Breil. Persuenter sa concentreschan ils exercizis da la flab a S-chanf. Areguard plazzas da la-vur resta en il Grischun tut sco fin qua. Sut il stritg vegnan mantegnias las 150 plazzas da l'armada.** Il schef da l'armada André Blattmann ha explitgà ier suenter la preschentaziun a Berna tge ch'il nov concept da staziunament munta precis per las regiuns grischunas.

**Tge mantegna l'armada en noss chantun?**

**André Blattmann:** La scola d'infanteria, la scola da recruta e da sutuffiziers resta sco fin qua en la caserna a Cuira. Quai è il pli impurtant per nus. Dasperas mantegnain nus anc Luziensteig. Là avain nus investì bler e possedain ina infrastruttura optimala. Er a S-chanf restain nus staziunads cun la flab mesauna. Gliez ha per mai gronda muntada, damai che nus avain a S-chanf en l'avegnir la suletta plazza da sajettar per la flab mesauna nua che nus pudain exercitar cun las scolas da recruts ed ils curs da repetiziun.

**Tge mida?**

Midadas datti tar il comando: La brigada d'infanteria da muntogna 12 vegn schliada si. Persuenter vegn la brigada mecanisada 11 staziunada a Cuira. Lezza è stada fin uss a Winterthur. Igl è stà nossa finamira da reparter ils commandos uschè bain sco pussaivel en l'entira Svizra. Il Grischun è per nus in impurtant chantun che sto era prender en cumpra immissiuns. Perquai avain nus vuli tschentiar in accent e staziunar questa brigada mecanisada a Cuira.

**La brigada d'infanteria da munto-**



André Blattmann, cumandant da corp, ha preschentà ier a Berna cun cusseglier federal Ueli Maurer il nov concept da staziunament.

KEYSTONE

**gna 12 vegn schliada si. Co succeda quai ?**

Las truppas da questa brigada vegnan repartidas. Cunzunt l'infanteria vegn suttamessa a la regiun territoriala 3 ch'è per exempel responsabla per il FEM. Uschia restan las truppas en la vischinanza nua ch'ellas vegnan duvradas.

**Tge senta il singul schuldà da questa midada?**

Il schuldà na senta nagut. El survegn

forsa in auter schef. Ma per il curs da repetiziun na fa quai probabel ora nagut.

**Il dagut amar dal nov concept da staziunament fiss pia Breil?**

Breil vegn schlià si. L'armada reducescha anc ina giada il dumber da partiziuns per la defensiun cunter aviuns (flab). Suenter il 2017 vegnain nus perquai a pudair renunziar sin Breil sco plazza d'exercizi. Il termin precis na savain nus dentant anc betg.

**A Breil na vegni betg pli a dar militar?**

Breil na vegn suenter la serrada da la plazza d'exercizi betg pli ad avair militar.

**Tge succeda a Valragh?**

Là resta tut sco fin qua, damai che nus cuntinuain là cun exercizis cun panzers e bittaminas.

**Avais Vos discutà questas midadas cun las vischnancas pertutgadas?**

Nus avain discurrì cun la regenza. Noss adressa da contact è en emprima lingua la regenza e cun lezza avain nus gi in barat intensiv. Quest onn sun jau stà plirs giadas en il Grischun e la midada planisada è sa chapescha adina vegnida tematisada.

**Nua avais vos fatg il pli savens militar en il Grischun?**

Jau hai fatg la recruta e la scola da sutuffizier a Cuira. A Breil hai jau passentà plirs curs da repetiziun tar la flab. Jau enconusch perquai mintga piz dal curn.

## Auters chantuns

### ston engaldir daplì

Entant che l'armada mantegna en il Grischun tantas plazzas sco fin qua sto il Vallais prender en cumpra ina sperdita da 50 plazzas. En tut serra l'armada en l'entira Svizra trais plazzas aviatcas, set plazzas d'armas e quatter plazzas da tir.

Il concept da staziunament ch'ins ha preschentà ier a Berna va uss en consultaziun tar ils chantuns. Las mesiras da spargn sa basan sin la decisiun dal parlament che l'armada duai sa reducir sin 100 000 schuldads e custar maximalmain 5 milliardas francs l'onn.

Il chantun che perda il pli fitg entras il nov concept da staziunament è il Vallais: Là procura oravant tut la serrada da la plazza aviatica a Sitten per sperditas da plazzas. En il Vallais vegn era serrà la plazza per la flab a Glurigen che ha il medem destin sco la plazza a Breil.